



Komunikadu Imprensa
Parlamentu Nasional
21 Marsu 2016

**Bankada Partidu Demokrátiku apoiu hanoin JSMP hodi hamosu Lei Indultu:
hanesan matadalan ba Prezidente Repúblika**

Iha 21 Marsu 2016, JSMP halo audénsia ho Xefe Bankada Partidu Demokrátiku, distinta deputada, Sra. Maria Lurdes M. de Sousa Besa hodi apresenta JSMP nia pareser kona-ba Proposta Lei Indultu.

Audénsia ne'e halo ho hanoin ida atu diskute no hato'o hanoin ba Bankada Partidu Demokrátiku kona-ba Proposta Lei indultu liu-liu iha relasaun ho prátika indultu prezidensial ne'ebé sempre hamosu debate pro no kontra iha públiku.

JSMP hanoin katak bele iha indultu ba prizoneiru sira, maibé tenki iha esepisaun ba krime sira lori prejuízu material no morál boot ba sosiedade. Krime hirak ne'e mak hanesan krime korrupsaun, krime transnasionál sira, krime grave no violasaun seksuál, inklui incestu. Hanoin hirak ne'e atu kontribui ba esforsu no komitmentu sira atu hametin setór justisa no promove instituisaun justisa sira ne'ebé iha prosesu konstrusaun nia laran. Aleinde ne'e, limita espasu no hakloot oportunidade ba korrupsaun ne'ebé buras iha Timor-Leste.

Xefe Bankada ne'e agradese tebes ba JSMP, tanba JSMP nafatin hakarak buka Bankada sira hodi apresenta kestaun Indultu. Partidu Demokrátiku apresia no apoiu hanoin JSMP nian kona-ba indultu. Tuir deputada ne'e katak hanoin JSMP nian kona-ba asuntu indultu ne'e hanesan mós ajenda Partidu Demokrátiku nian. Tanba ne'e Partidu Demokrátiku sei halo esforsu hotu hodi inklui hanoin sira ne'e iha lei indultu ne'e no sei konsidera krime sira ne'ebé JSMP propoin atu limita sira nia direitu hodi hetan indultu.

“JSMP fiar katak utilizaun podér indultu nu'udar kompetensia ne'ebé Konstituisaun RDTL fó ba Prezidente Repúblika no nu'udar direitu prerogativu Prezidente nian. Maské nune'e, importante atu iha lei ida ne'ebé guia prosesu ne'e no atu asegura katak kompténsia ne'e ezerse iha maneira ida ne'ebé rigoroza no apropriadu,” dehan Luis de Oliveira Sampaio, Diretór Ezekutivu JSMP.

JSMP rekomenda atu prosesu indultu ka kualker forma ne'ebé Prezidente utiliza tenke iha opsaun atu hamenus pena gradualmente, la'os hasai totál hosi prizaun hanesan prátika sira ne'ebé durante ne'e akontese. Ida ne'e sei hametin liu tan povu nia konfiansa ba instituisaun justisa no halakon interpretaun no persepsaun públiku katak, justisa ba ema kiik de'it.

Aleinde apresenta hanoin kona-ba Proposta Indultu, JSMP mós apresenta hanoin no elaborasaun seluk kona-ba alterasaun Lei Pensaun Vitalisia no Projeitu Lei Anti Korupsaun ne'ebé pendente hela. Xefe Bankada afirma katak antes ne'e iha 2015, sira hatama Proposta ba Alterasaun ba Lei Pensaun Vitalisia maibe Meja Parlamentu Nasional la-konsege hatama ba agenda atu lori ba plenaria hodi diskuti.

Tuir planu audénsia hanesan sei halo mos ho Bankada Fretilin no CNRT.

Atu hetan informasaun kle'an liu tan favor kontaktu:

Luis de Oliveira Sampaio
Diretór Ezekutivu JSMP
E-mail: luis@jsmp.minihub.org